

四庫全書

經部

欽定四庫全書

經部

尚書全解卷二

詳校官給事中_臣李臺

通政使司副使_臣莫瞻菴覆勘

覆校官編修_臣汪鏞

校對官監丞_臣張曾炳

謄錄舉人_臣史殿榮

欽定四庫全書

經部二

尚書全解

書類

提要

臣等謹案尚書全解四十卷宋林之竒撰之
竒字少頴號拙齋侯官人官至宗正丞事蹟
具宋史儒林傳之竒辭祿家居博考諸儒之
說以成是書宋志作五十八卷此本僅標題
四十卷考其孫明後序稱脫稿之初為門人

呂祖謙持去諸生傳錄僅十得二三書肆急于鋟梓遂訛以傳訛至淳祐辛丑畊從陳元鳳得宇文氏所傳書說拾遺手稿一冊乃康誥至君陳之文乙巳得建安余氏所刻完本始知麻沙所刻自洛誥以下皆偽續又得葉真所藏林李二先生書解參校證驗釐為四十卷然則宋志所載乃麻沙偽本之卷數朱子所謂洛誥以後非林氏解者此本則畊所

重編朱子未見夏僎作尚書解時亦未見故
所引之奇之說亦至洛誥止也然畊既稱之
奇初稿為呂祖謙持去則祖謙必見完書何
以東萊書說始於洛誥以下云續之奇之書
母乃畊又有所增修託之乃祖歟自宋迨明
流傳既久又佚其三十四卷多方一篇通志
堂刊九經解竭力購之弗能補也惟永樂大
典修自明初其時猶見舊刻故所載之奇書

解此篇獨存今錄而補之乃得復還舊觀之
奇是書頗多異說如以陽鳥為地名三俊為
常伯常任準人皆未嘗依傍前人至其辨折
異同貫串史事覃思積悟實卓然成一家言
雖真贋錯雜不可廢也屢經散佚而卒能完
善亦其精神刻摯有足以自傳者矣前有自
序一篇述尚書始末甚詳然舛誤特甚漢書
藝文志已明云古文尚書孔安國獻之遭巫

盡不列於學官而用偽孔傳序藏於家之說
併謂劉歆未見儒林傳明言伏生壁藏其書
漢興亡數十篇獨得二十九篇而用衛宏古
文尚書序使女傳言之說併謂齊語難曉尤
其致謬之大綱闕若璩諸人已明辨茲不
具論焉乾隆四十二年七月恭校上

總纂官

臣紀昀

陸錫熊

臣孫士毅

總校官

臣陸費墀

陸費墀

欽定四庫全書

尚書全解序

理義者人心之所同然也聖人之於經所以關百聖而不慙蔽天地而無恥者蓋出於人心之所同然而已苟不出於人心之所同然則異論曲說非吾聖人之所謂道也孔子曰君子之於天下也無適也無莫也義之與比竊謂學者之於經苟不知義之與比先立適莫於胷中或以甲之說為可從以乙之說為不可從以乙之說

為可從以甲之說為不可從如此則私議鋒起好惡閭
然將不勝其惑矣安能合人心之所同然哉苟欲合人
心之所同然以義為主無適無莫平心定氣博採諸儒
之說而去取之苟合於義雖近世學者之說亦在所取
苟不合於義雖先儒之說亦所不取如此則將卓然不
牽於好惡而聖人之經旨將煥然而明矣書孔子之所
定凡百篇孔子之前書之多寡不可得而見書緯云孔
子得黃帝元孫帝魁凡三千二百四十篇為尚書斷近

取遠定其可為世法者百二十篇為簡書此說不然古書簡質必不如是之多也班孟堅藝文志於古今書外又有周書七十一篇劉向云周時號今蓋孔子所論百篇之餘於周時所刪去者纔七十一篇自周以前疑愈少矣謂有三千餘篇非也孔子百篇遭秦火無存至漢時伏生口授得二十八篇後又得偽泰誓一篇為二十九篇孔壁之書既出孔安國定其可數者二十五篇又別出舜典益稷盤庚康王之誥共為五十八篇其文以

隸書存古文故謂之古文尚書此書之成遭巫蠱而不
出漢儒聞孔氏之書有五十八篇遂以張霸之徒造偽
書二十四篇為古文尚書兩漢儒者之所傳大抵霸偽
本也其實未嘗見真古文尚書也故杜預註左氏傳韋
昭注國語趙岐注孟子凡所舉書出於二十五篇之中
皆指為逸書其實未嘗逸也劉歆當西漢之末欲立古
文書學官移書責諸博士甚力然歆之所見皆霸偽本
亦非真古文書也以至賈馬鄭服之輩亦皆不見古文

書至於晉齊之間然後其書漸出及開皇二年求遺書
得舜典然後其書大備嗚呼聖人之經可謂多厄矣遭
秦火失其半其半存者又隱而不出自漢武帝巫蠱事
起至隋開皇二年凡六百七十餘年然後五十八篇得
傳於學者而大備是可歎也孔氏書始出皆用隸書至
唐天寶間詔衛衡改古文從今文書今之所傳乃唐天
寶所定之本也此蓋書之始末也學必欲知書之本末
者蓋有伏生之書有孔壁續出之書夫五十八篇皆帝

王所定之書有坦然明白而易曉者有艱深贅牙而難曉者如湯誓湯誥均成湯時誥令如說命高宗彤日均高宗時語言如蔡仲之命微子之命康誥皆周公誥命然而艱易顯晦迥然不同者蓋有伏生之書有孔壁續出之書其文易曉不煩訓詁可通者如大禹謨胤征五子之歌仲虺之誥湯誥伊訓太甲三篇咸有一德說命三篇泰誓三篇武成旅獒微子之命蔡仲之命周官君陳畢命君牙冏命此二十五篇皆孔壁續出其文易曉

餘乃伏生之書多艱深聲牙不可易通伏生之書所以
艱深不可通者伏生齊人也齊人之語多艱深難曉如
公羊亦齊人也故傳春秋語亦艱深如昉於此乎登來
之也何休注曰齊人語以是知齊人語多難曉者伏生
編此書往往雜齊人語於其中故有難曉者衛宏序古
文尚書言伏生老不能正言使其女傳言教晁錯齊人
語多與潁川異晁錯所不知者二三僅以其意屬讀而
已觀此可見以是知凡書之所難曉者未必帝王之書

本如是傳者汨之矣

明自兒時侍先君盱江官舍郡齋修刊禮樂書先君實
董其事與益國周公誠齋楊先生書問往來訂正訛舛
甚悉暇日因與言曰吾家先拙齋書解今傳於世者自
洛誥以後皆訛蓋是書初成門人東萊呂祖謙伯恭取
其全本以歸諸生傳錄十無二三書坊急於餽梓不復
參訂訛以傳訛非一日矣先君猶記鄉曲故家及嘗從
先拙齋遊者錄得全文及歸方尋訪未獲不幸此志莫

償畊早孤稍知讀書則日夕在念慮間汨汨科舉業由鄉選入太學跋涉困苦如是者三十餘年淳祐辛丑僥倖末第閑居需次得理故書日與抑齋今觀文陳公虛齋今文昌趙公參考講求振趨請益抑齋出示北山先生手蹟具言居官婺女日從東萊先生學東萊言吾少侍親官於閩從林少穎先生學且具知先拙齋授書之由時抑齋方閱六經疏義尤加意於林呂之學虛齋亦倣朱文公辯孔安國書著本旨畊得互相詰難其間凡

諸家講解搜訪無遺一日友人陳元鳳儀叔攜書說拾遺一集示余蠹蝕其表蠅頭細書云得之宇文故家蓋宇文之先曾從拙齋學親傳之稟也其集從康誥至君陳此後又無之遂以鋟本參較康誥酒誥梓材召誥皆同鋟本自洛誥至君陳與鋟本異其詳倍之至是益信書坊之本誤矣當今兒輩作大字本謄出以元集歸之然猶未有他本可以參訂也又一朋友云建安書坊余氏數年前新刊一本謂之三山林少穎先生尚書全解

此集蓋得其真刊成僅數月而書坊火今板本不存矣
余亦未之信因徧索諸鬻書者乙巳仲春一老丈鶉衣
銜袖踉蹌入門喜甚揖余而言曰吾為君求得青氎衣
開視果新板以尚書全解標題書坊果建安余氏即倍
其價以鬻之以所贖本參較自洛誥至石陳及顧命以
後至卷終皆真本向者麻沙之本自洛誥以後果偽矣
朋友轉相借觀以為得所未見既而明暫攝鄉校學錄
葉君真里之耆儒嘗從勉齋遊其先世亦從拙齋學與

東萊同時又出家藏寫本林李二先生書解及詩說相
示較之首尾並同蓋得此本而益有證驗矣嗟夫此書
先拙齋初著之時每日誦正經自首至尾一遍雖有他
務不輟貫穿諸家旁搜遠紹會而粹之該括詳盡不應
於洛誥以後詳略如出二手今以諸本參較真贗曉然
信而有證可以傳而無疑矣書解自麻沙初刻繼而婺
女及蜀中皆有本然承襲舛訛竟莫能辨柯山夏氏解
多引林氏說自洛誥以後則略之僅有一二語亦從舊

本往往傳訛東萊解只於禹貢引林三山數段他未之
詳東萊非隱其師之說蓋拙齋已解者東萊不復解而
唯條暢其義嗟夫書自安國而後不知其幾家我先拙
齋裒集該括自壯及老用心如此之勤用力如此之深
始克成書而傳襲謬誤後學無從考證我先君家庭授
受中更散亡極意搜訪竟無從得咄恪遵先志又三十
餘年旁詢博問且疑且信及得宇文私錄又得余氏新
刊全解又得葉學錄家藏寫本稽驗新故訂正真贗參

合舊聞而後釋然以無疑確然而始定然則著書傳後
豈易云乎哉咉既喜先拙齋之書獲全又喜先君縣丞
之志始遂顧小子何力之有抑天不欲廢墜斯文故久
鬱而獲伸與不然何壁藏汲冢之復出也淳祐丁未之
歲石鼓冷廳事力甚微學廩粗給當路諸公不賜鄙夷
捐金撥田悉有所助三年之間補葺經創石鼓兩學輪
奐鼎新書版舊帙缺者復全於是慨然而思曰我先君
未償之志孰有切於此者吾先世未全之書豈容緩於

此者實為子孫之責也乃會書院新租歲入之積因郡
庠憲臺撥鏹之美擲學廳清俸公給之餘計日命工以
此全書亟鋟諸梓字稍加大匠必用良版以千計字以
五十萬計釐為四十卷始於己酉之孟冬迄明年夏五
月而畢是書之傳也亦難矣哉亦豈苟然哉舊本多訛
畊偕次兒駿伯重加點校凡是正七千餘字今為善本
庶有補於後學淳祐庚戌夏五嗣孝孫迪功郎衡州州
學教授兼石鼓書院山長明謹書

觀林君耕叟序述其先王父全書始末兩世訪求志亦苦矣先是抑齋陳先生為僕言閩學源流開教甚悉廼知始於紫微呂公載道而南而拙齋先生實親承心學拙齋著書多而於尚書尤注意即少穎先生書解是也然自洛誥以後傳者失真世不得見其全書為恨先生之猶子諱子冲登癸丑科為南豐簿嘗分教盱江再轉為丞僕頃在庫序尚及識縣丞公於大席縣丞公在盱據勘遺文多矣獨於拙齋全書散逸之餘訪求而未得

不幸齋志以沒又數十年而先生之孫畊始克募就豈
其書之泰阮固自有時邪拙齋雖不克竟其用而傳聖
賢之心壽斯文之脉其功大矣縣丞公尅志世其學而
略不獲施於用至畊而全書始出以傳惟拙齋之學卓
然光明久而益昌何庸繪畫畊字耕叟為衡州教授暨
先生甫三世其孜孜問學多識往行好修者也君子曰
無忝厥祖淳祐十年七月既望後學盱江鄧均拜手書
於湖南漕司湘山觀

欽定四庫全書

尚書全解卷一

宋 林之奇 撰

堯典

虞書

昔在帝堯

昔在者篇首起語之辭書序自為一篇故以昔在帝堯起於篇首如孔氏序云古者伏羲氏之王天下也鄭氏云昔在者使若無先之者唐孔氏云在昔者自

下本上之辭言昔在者從上自下為稱據代有先之而書無所先故云昔也此說未是書始於堯典云昔在帝堯謂書無所先堯可也至同命言在昔文武豈書亦無先之者乎五帝序云惟昔黃帝法天則地正與此同聰明文思光宅天下

漢孔氏曰言聖德遠著其說甚善大抵說經之體貴不費辭如秦近君說堯典二字至十餘萬言但說若稽古猶三萬言雖多亦奚以為哉是以古之人其說

經也以約為難不以多為難昔孔子之解經其言愈約其意愈明如詩云天生烝民有物有則民之秉彝好是懿德但於本文外加二故字一必字一也字詩意昭然如日星又何必以多為哉如孔氏云聖德遠著聰明丈思聖德也光宅天下遠著也一言之間豈不簡而盡哉大抵聖德當其妙藏諸用之時而觀之運於無聲無臭之間不可得而見所得見而形容者惟其顯諸仁而已聰明丈思皆其德著見於外而

可見也其視明其聰聰其文煥然其思湛然此四者之充實於一身而其輝光所至塞乎天地之間蓋其德之著見於外而可見者漢孔氏云聖德遠著可謂約矣於約之中有深義存焉學者未宜以淺近而盡言也

將遜于位讓于虞舜作堯典

遜遁也春秋夫人姜氏遜于齊公遜于邾其義蓋出於此遜于位非謂逃遁而去也蓋厭倦萬機之務將

使舜攝行天子之事而嬪焉孟子所謂堯老而舜攝也堯典之序有云將遜于位讓于虞舜者蓋二典皆虞書也虞書紀舜之事而推本其所得天下於堯故序其事於堯典實為舜典張本正杜元凱序左傳所謂先經以始事是也

堯典

此二字史官之舊題也古者序自為一篇故史官以此二字為題孔氏既引序冠於篇首因存而不去其

竊謂篇首既書堯典而又存此二字則為衍文當於將遜于位讓于虞舜作堯典下空一行曰若稽古帝堯乃為得體

曰若稽古帝堯曰放勳

若稽古者孔氏曰能順考古道而行之者王氏云聖人於古有可稽者有可若者李校書推本古文書以曰字為胡越之越與召誥越若來三月同此說甚善當從李校書之說程氏云若稽古者史官之體發論

之辭也史官記載前世之事若考古某人之事言之
下篇云若稽古帝舜若稽古大禹若稽古皐陶皆謂
考古某人之事為如此也蘇氏云史之為此書也謂
吾順考在昔而得其為人之大凡如此蓋此四篇若
稽古某人下皆有曰字故二公之說如此其說比先
儒為優然而此皆虞書也虞書謂堯為古可也禹皐
陶其時尚存亦謂之古可乎則此說不通若從周官
唐虞稽古之文以稽古為堯則下加曰字又為難說

如允迪厥德臯陶之言也謂若稽古臯陶曰可也放
勲重華文命以下非堯舜禹之言而加曰字則其義
不行此說為難折故當闕之以俟知者放勲李校書
曰放者大而無所不至也禮記曰夫孝置之而塞乎
天地溥之而橫乎四海施諸後世而無朝夕推而放
諸東海而準推而放諸西海而準推而放諸南海而
準推而放諸北海而準鄭玄云放猶至也謂堯有大
功也孔子曰大哉堯之為君也蕩蕩乎民無能名焉

是勲之謂也此說甚善孟子以放勲為堯號放勲曰
勞之來之匡之直之輔之翼之又曰二十有八載放
勲乃徂落屈原曰為重華而陳詞孟子屈原既以放
勲重華為堯舜之號而後世以類推之遂以文命為
禹之號然允迪不可為皋陶之號其說不通世人多
疑之諸家之說皆不然某嘗謂鄭少梅曰史官作火
之時蓋以是稱堯舜禹之功德後人因史官有是稱
遂以放勲重華文命為堯舜禹之號然允迪不可為

臯陶之號故不可以為稱正如子貢之稱夫子曰固
天縱之將聖又多能也蓋稱夫子之德如此後世遂
稱夫子為將聖與此正同

欽明文思安安

史記曰堯有大功於是推言其所以為大功者欽明
文思安安允恭克讓光被四表格于上下此其所以
為大功也大抵形容聖人之盛德必推其著見者而
言之堯曰欽明文思舜曰濬哲文明湯曰齊聖廣淵

文王曰徽柔懿恭夫子曰溫良恭儉讓皆稱其德之
著而言之也欽明文思者蓋言帝堯之德著見於外
其行已也欽其遇事也明外則有煥然之文內則有
淵然之思此言與序大抵相同然序則言聰明文思
此則言欽明文思蓋史官便於文體而序述也前言
聰明者言堯能分明邪正得虞舜於側微卒授以天
下故言聰明欲與下文讓于虞舜文勢相接此言欽
明文思者意與下文允恭克讓相應皆隨宜立文非

有深肯於其間也孔氏云安天下之所當安然下文
黎民於變時雍方是安天下之所當安者此謂安安
者蓋言堯有欽明文思之四德安而行之非事於勉
強修為若孟子所謂性者也

允恭克讓

唐孔氏云在己既有四德其接人也又信恭能讓允
恭者謂恭出於誠實非於聲音笑貌之間如文王所
謂懿恭是也克者能也經稱湯居上克明為下克忠

又曰克寬克仁詩稱文王曰克明克類克長克君皆
謂能其事也彼有望塵雅拜搖尾乞憐非不恭也允
恭安在隱公之遜桓丁鴻之遜弟非不遜也克讓安
在恭而允讓而克所以獨稱於堯也

光被四表格於上下

即所謂光宅天下也立政曰方行天下至於海表罔
有不服四表謂四海之外也格於上下謂上際於天
下蟠于地也曾氏曰光被四表則與日月合明而照

臨之功無不被格于上下則與天地同流而覆載之
功無不及此說盡之大抵論聖人之德必推其著見
者言之中庸曰惟天下至聖為能聰明睿智足以有
臨也寬裕溫柔足以有容也發強剛毅足以有執也
齊莊中正足以有敬也文理密察足以有別也溥博
淵泉而時出之溥博如天淵泉如淵見而民莫不敬
言而民莫不信行而民莫不悅是以聲名洋溢乎中
國施及蠻貊舟車所至人力所通天地之所覆載日

月之所照臨霜露之所降凡有血氣者莫不尊親故
曰配天此則人之所共聞而共見也至如惟天下至
誠為能經綸天下之大經立天下之大本知天地之
化育夫焉有所倚肫肫其仁淵淵其淵浩浩其天苟
不固聰明聖知達天德者其孰能知之此則非火官
所得形容也

克明俊德以親九族九族既睦平章百姓百姓昭明協
和萬邦黎民於變時雍

前既言堯之德其見於充實輝光者如天地之覆載
日月之照臨可謂極其至矣此又言其舉而措之天
下事業者也克明俊德大學曰自明也孔氏曰能明
俊德之士此二說不同而李校書以謂前既言堯之
德欽明文思安安允恭克讓光被四表格于上下矣
不應於此重述其德也遂以孔氏之說為是如經言
俊民籲俊之類皆謂俊傑之士也大學之言漢儒所
作斷章取義云爾此說是也唐孔氏言堯之為君也

能尊明俊德之士使之助已施化以此賢臣之化先
令親其九族之親九族蒙化已親睦矣又使之和協
顯明於百官之族百姓蒙化皆有禮儀昭然而明顯
矣又使之合會調和天下之萬國其萬國之衆人於
是變化從上是以風俗大和此說大體是也九族當
從夏侯歐陽氏以謂父族四母族三妻族二孔氏傳
謂高祖玄孫之親非也蓋高祖非已所得而逮事玄
孫非已所得而及見若必謂非高祖玄孫之親但據

其族係出於高祖者則但本宗族亦何以為九族哉
其既睦之九族若只本宗之一宗則其睦也亦不廣
矣若以謂父族四母族三妻族二則旁及他族而本
族亦在其中則其所睦者豈不廣哉父族四父五屬
之內一也父之女昆弟適人者及其子二也已之女
昆弟適人者及其子三也已之女子適人者及其子
四也母族三母之父姓一也母之母姓二也母之女
昆弟適人者及其子三也妻族二謂妻之父姓一也

妻之母姓二也蓋敦宗睦族之道必徧內外之親晏
子曰使吾父之黨無不乘車者吾母之黨無不足衣
食者妻之黨無有凍餒者敦九族之道固自此始百
姓者百官族姓也不謂百官族姓而謂百姓者但舉
其大數而言唐孔氏曰唐虞稽古建官惟百故言百
姓蘇子瞻亦云百姓者蓋是時上世帝王子孫其得
姓者百餘族而已故曰百姓此說不然五子之歌曰
萬姓仇予豈唐虞之世始有百姓而至夏頊有萬姓

哉平章者平章百官之職業而升黜之後世以宰相
為平章事蓋出於此於變者唐孔氏曰其萬國之衆
人於是變化從上子和云於者歎美之辭也蓋言之
不足故嗟歎之與詩所謂於論鼓鐘之於字同當作
於字讀竊謂當從子和之說如詩人稱頌盛德曰於
穆清廟於緝熙敬止於鑠王師同此言堯治功之成
故以於變言也時雍者孔氏云是以風俗大和程氏
曰化成俗美而時雍和程氏之說善親九族言以親

九族平章百姓協和萬邦不言以者曾氏云蒙上之
以也九族言既睦百姓昭明黎民於變時雍不言既
者曾氏云蒙上之既也上言以親下言既睦上言協
和下言於變時雍此蓋古史交互立文以見意無異
義也夫九族者堯之九族也必得明俊德之士而後
親者李校書曰親親治之始也然所以至於治者非
賢人其孰能任之後世用非其人而父子不相保者
有之況九族乎此說甚善如漢武帝用一江充而太

子諸王皆死巫蠱之禍唐明皇用一楊國忠一日而殺三子使其當時用董仲舒張九齡輩豈有此禍哉此章蓋前之所言者謂堯以誠明之性格物致知正心誠意以修其身至於與天地合其德與日月合其明而又能舉天下之賢才而與之共治故能施于有政蓋所謂為政以德譬如北辰居其所而衆星拱之者也是以其教不肅而成其政不嚴而治故能施于有政蓋有不期然而然者矣故親九族則九族睦矣

平章百姓則百姓昭明協和萬邦則黎民於變時雍
矣非立之斯立道之斯行綏之斯來動之斯和疇克
爾邪使夫子之得邦家亦若是而已矣

乃命羲和

程氏曰前既言堯之克明俊德始於敦睦九族以至
於協和萬邦黎民於變時雍此又言立政紀綱分正
百官之職以熙庶績而事之最大最先莫若推測天
道明歷象欽若時令以授人也天下萬事未有不本

於此蓋人君之治天下惟此二端而已治身齊家以至平天下者治之道也建立紀綱分正百官明天道以制事者治之法也作典者論堯之德盡在於此矣自帝曰疇咨以下著其事以見堯之聖此說甚善言黎民於變時雍繼以乃命羲和與周官設官分職以爲民極之下言乃立天官冢宰乃立地官司徒之類同唐孔氏云乃命羲和者重述克明俊德之事得致雍和所由已上論堯聖性此說堯任賢據堯身而言

用臣故云乃命非時雍之後方始命之此論為當義
和者楚語云少昊之衰九黎亂德人神雜擾不可方
物顓頊受之乃命南正重司天以屬神北正黎司地
以屬民使復舊常無相侵瀆其後三苗復九黎之惡
堯復育重黎之後不忘舊者使復典之呂刑曰皇帝
哀矜庶戮之不辜報虐以威遏絕苗民無世在下乃
命重黎絕地天通罔有降格揚子雲曰義近重和近
黎是以堯之義和即顓頊之重黎是也蓋義承重和

承黎唐孔氏云羲和雖別為氏族而出自重黎謂羲和為氏族則不然如下云咨汝羲暨和則似名矣非氏族也王氏云散義氣以為義斂仁氣以為和日出之氣為義義者陽也利物之謂和和者陰也羲和即人之名安有陰陽仁義之說哉此不可行也

欽若昊天

孔氏云昊天者元氣廣大也欽若者敬順也爾雅曰春曰蒼天夏曰昊天秋曰旻天冬曰上天鄭氏謂春

氣博施故以廣大言之夏氣高明故以遠言之秋氣
或生或殺故以閔下言之冬氣閉藏而清察故以監
下言之王氏云天色可見者蒼蒼而已故於春言其
色氣至夏而行故於夏言其氣情至秋而知故於秋
言其情冬位正乎上故於冬言其位皆鑿說也孔氏
云六籍之中諸稱天者以情所求言之非必於其時
稱之此說甚善毛詩傳云尊而君之則曰皇天元氣
廣大則曰昊天仁覆閔下故稱昊天自上監下故稱

上天據遠視之蒼然則稱蒼天此說與孔氏合最為得之

歷象日月星辰

欲欽若昊天者必有其法歷象日月星辰此其法也
歷數也周天三百六十五度四分度之一而以日月
星辰之久近紀歲月之先後也象者璣衡也所以參
考日月星辰之行度也日行一度月行十三度十九
分度之七星者四方之中星也角亢氐房心尾箕為

青龍凡七十五度斗牛女虛危室壁為玄武凡九十
八度四分度之一奎婁胃昂畢觜參為白虎凡八十
度井鬼柳星張翼轸為朱雀凡百一十二度共為三
百六十五度四分度之一辰則日月所會也正月會
於亥其辰為娵訾二月會於戌其辰為降婁三月會
於酉其辰為大梁四月會於申其辰為實沈五月會
於未其辰為鶉首六月會於午其辰為鶉火七月會
於巳其辰為鶉尾八月會於辰其辰為壽星九月會

於卯其辰為大火十月會於寅其辰為析木十一月
會於丑其辰為星紀十二月會於子其辰為玄枵星
與辰一也據其人之所見而言之則謂之星據其日
月所會而言之則謂之辰鄭氏以星為五緯辰為日
月所會十二次者則以星辰為二然而此論欽授民
時無取於五緯之義

敬授人時

孔氏云欽紀天時以示人也蓋天時苟不定於歷象

則人事無得而興故堯先歷象星辰而後欽授民時也薛氏云周建子天時也商建丑地時也夏建寅人時也堯之所授為人事而已以建寅之月授之故曰欽授人時此說雖近似然而改正朔始於周時堯舜之世無三正之異故春秋疏舉鄭氏曰正朔三而改自古皆相變而以其說為不然謂古惟用夏正惟商革夏命而用建丑周革殷命而用建子觀此說則薛氏之說亦不可用矣據人時但言民時也史記作民

時其義蓋通自分命義和以下所謂歷象日月星辰敬授人時者也

分命羲仲宅嵎夷曰暘谷寅賓出日平秩東作日中星鳥以殷仲春厥民析鳥獸孳尾申命羲叔宅南交平秩南訛敬致日永星火以正仲夏厥民因鳥獸希革分命和仲宅西曰昧谷寅餞納日平秩西成宵中星虛以殷仲秋厥民夷鳥獸毛毨申命和叔宅朔方曰幽都平在朔易日短星昴以正仲冬厥民隩鳥獸氄毛帝曰咨汝

義暨和朞三百有六旬有六日以閏月定四時成歲允
釐百工庶績咸熙

分命義仲

申命義叔

分命和仲

申命和叔

此一辰皆是觀象作歷之法所以定中氣起閏餘也
蓋必先奠方隅測時氣齊畧刻候中星而又驗之於
農事之早晚物類之變化然後中氣可得而定中氣
既定然後閏餘可得而推也學者於此不可以他求

惟求作歷之法而盡得之矣分命申命孔氏乃命羲
和以下注云此舉其目下別序之以是知羲仲羲叔
和仲和叔即前之羲和馬融鄭玄王肅之徒云乃命
者為天地之官分命申命為四時之職天地與四時
於周則冢宰司徒之屬六卿是也此說雖近似然上
文言乃命羲和而下文言羲仲羲叔和仲和叔之命
乃是詳言歷象日月星辰之事非如周之六卿有治
教禮政等之異也前言乃命後言分命申命皆是錯

綜其文以成義也義仲義叔和仲和叔猶曰仲突仲
忽叔夜叔夏是也

宅嵎夷曰暘谷 宅南交

宅西曰昧谷 宅朔方曰幽都

此所以奠方隅也蓋作歷之法必在候日月之出沒
星辰之躔度欲候日月之出沒星辰之躔度者必先
準定四面方隅之地為表識東曰嵎夷西曰昧谷南
曰南交北曰幽都四方既定然後可以候日月之出

沒測星辰之運行而歷象之法自此起矣古者設為
土圭之法以測日景土圭之景七尺五寸景之中也
日至之景尺有五寸短之至也丈有三尺長之至也
其法必於地中之所日中之時施圭以度焉日南則
景短多暑日北則景長多寒日西則景夕多風日東
則景朝多陰據此下丈有日中日永宵中日短則是
以土圭測日景之法於堯時已有之矣欲求天地之
中者苟不先立土圭以測日景準定四方之地則何

以定天地之中此蓋作歷之始也嵎夷青州之嵎夷也在正東故東曰嵎夷南交孔氏云夏與春交王氏云南方相見之時陰陽之所交也故曰南交此說不然於東西曰嵎夷曰昧谷皆地名也不應於南方獨言其萬物相見之時其說為不類蓋南交即交趾也案史記五帝本紀曰黃帝之地北至於幽陵南至於交趾則交趾之對幽都其來尚矣又歷象欲知日月之食不食每於此候之唐一行云開元十二年七月

戊午朔據歷當食半弦自朔方至於交趾候之不差是以知南方為交趾無疑矣交趾在正南故曰南交宅西者隴西之西縣也在正西故曰宅西幽都舜時之幽都也在正北故北曰幽都也四方既定矣然後可以候日月之出沒測星辰之運行以起歷法曰暘谷昧谷孔氏曰暘明也日出於谷而天下明故稱暘谷昧冥也日入於谷而天下冥故曰昧谷蓋嵎夷之方日出之地也隴西之方日入之地也據其地而言

之則謂之嵎夷謂之宅西據其日月出沒而言之則謂之暘谷謂之昧谷將欲賓出日而餞納日故先定暘谷昧谷之地也幽都堯都幽冀在九州之正北也南方又宅於南交故不言曰也

寅賓出日

寅餞納日

賓釋文如字讀而徐氏謂之曰儼據孔氏云賓導也則音儼者是與儼相之儼同如賓出日餞納日蓋將以候日晷之早晚以驗晷刻之長短也寅敬也賓之

餞之非實有賓餞之禮也唐孔氏云導者引前之言
送者從後之稱因其出也導以引之因其入也從而
送之各以其所宜立文其說是也帝嚳歷日月而迎
送之即此法也

平秩東作

平秩南訛

平秩西成

平在朔易

陰陽四時之氣運於天地之間造化密移莫不有序
平秩平在者平均次序在察之蓋所以候其氣節之

早晚如後世分定二十四氣之類是也孔氏於南訛云訛化也平序南方化育之事於西成言西方萬物已成平序其政助成物也於在朔易言歲改易於朔方平均在察其政則是以南訛西成朔易皆謂天時也至於論東作則謂歲起於東而始就耕平均次序東作之事以務農也則此一方獨以農事言之案下文厥民析方是言分散以就農此但謂萬物發生於東耳非取於農作之義也惟曾氏以謂春為陽中萬

物以生秋為陰中萬物以成且引詩薇亦作止老子
萬物並作為證此可以補先儒之失

敬致

敬致者孔氏謂敬行其教以致其功其說不然若以
為敬致其教則何獨於南方言之以是知敬致者當
是致日也周官春夏致日秋冬致月左氏曰日官居
卿以致日則敬致者致日之謂也蓋歷法欲候日月
之出沒此以昏旦見於南方之中星以定晷度之所

至謂之敬致與寅賓寅饒同但其文勢有先後耳如
月令云日在營室昏參中旦尾中謂日在營室有昏
有旦者此所謂賓出日饒納日也謂昏參中旦尾中
者即此所謂敬致也賓日於東饒日於西然後日中
日永宵中日短可得而知也敬致南方之中星矣然
後星鳥星火星昴星虛可得而見也此二者可得而
知然後分至之氣可得而定矣故繼之曰日中星鳥
以殷仲春日永星火以正仲夏宵中星虛以殷仲秋

日短星昴以正仲冬

日中星鳥以殷仲春 日永星火以正仲夏

宵中星虛以殷仲秋 日短星昴以正仲冬

鳥火虛昴皆是分至之昏見於南方直正午之中星而孔氏以謂七星畢見不以為中星故唐孔氏云仲春之月日在奎婁入於酉地則初昏之時井鬼在午柳星張在巳翼軫在辰仲夏之月日在東井而入於酉地則初昏之時角亢在午氐房心在巳箕尾在辰

仲秋之月日在角亢而入於酉地則初昏之時斗牛
在午女虛危在巳室壁在辰仲冬之月日在斗入於
酉地則初昏之時奎婁在午胃昂在巳畢觜參在辰
信如孔氏此說則是鳥火虛昴當分至昏皆見於巳
非正午也其何謂四方中星哉王子雍覺其非遂謂
宅嵎夷宅南交宅西宅朔方孟月也日中日永宵中
日短仲月也星鳥星火星虛星昴季月也此說並與
歷家偶合然分孟仲季非書之意蓋二孔王氏皆不

知歷家有歲差之法以月令日在某宿而求之所以不合紫歷家自北齊向子信始首知歲法以古歷稽之凡八十餘年差一度月令日在某宿比之堯時則已差矣以日會月在某宿求之中星宜其不合矣故唐一行云月在虛一則星火星昴皆以仲月昏中而沈存中亦云堯典日短星昴今乃日短星東壁以是知歲差之法乃歷家之所通知特先儒未之思耳蓋仲春之月日在昴入於酉地則初昏之時鶉火之星

見於南方正午之位當是時也晝夜分晝五十刻夜五十刻是為春分之氣故曰日中星鳥以殷仲春仲夏之月日在星入於酉地初昏之時大火之星見於南方正午之位當是時也晝長夜短晝六十刻夜四十刻是為夏至之氣故曰日永星火以正仲夏仲秋之月日在心入於酉地則初昏之時虛星見於南方正午之位當是時也晝夜分晝五十刻夜五十刻是為秋分之氣故曰宵中星虛以殷仲秋仲冬之月日

在虛入於酉地初昏之時昴星見於南方正午之位
方是時也晝短夜長晝四十刻夜六十刻是為冬至
之氣故曰日短星昴以正仲冬分至之氣既定則十
二月之氣無不定矣春曰日中秋曰宵中蓋互丈以
見日夜之分也春曰星鳥夏曰星火秋曰星虛冬曰
星昴者蓋四方躔度之星以名言之自角亢氐房心
尾箕至於井鬼柳星張翼軫凡二十有八以日月所
會言之自娵訾降婁大梁實沈鶉首鶉火鶉尾壽星

大火析木星紀至於玄枵凡一十有二以物象言之
則青龍玄武白虎朱雀凡四作典者欲備見故互言
之春秋言殷冬夏言正者亦猶春秋謂之分冬夏謂
之至也分至定則十二月之中氣無不定矣然猶以
為未也而又以析因夷隲驗之於農事早晚故繼之
曰厥民析厥民因厥民夷厥民隲

厥民析

厥民因

厥民夷

厥民隲

孔氏云析者言春事既起丁壯就功言其民老壯分
析因者謂老弱因就在田之丁壯以助農也夷者平
也老壯在田與夏平孔氏此說不然也於夏既言老
弱因就在田於秋又言與夏平則是三時之辭其言
無異非說經之體也程氏謂夷者平也秋稼將盛歲
事將畢民獲卒歲之實心力平夷安舒也厥民隩者
漢孔氏云隩者屋也民改歲入此室處胡氏謂不然
以謂若如孔氏之說當作與字讀爾雅曰室西南隅

謂之與孫炎曰室中隱奧之處據陸氏釋文云於六
反馬云隤暖也冬寒民集隱暖此說為是既定民事
之早晚矣此以為未也猶考物類之變化

鳥獸孳尾

鳥獸希革

鳥獸毛毼

鳥獸氄毛

帝曰咨汝羲暨和晷三百有六旬

有六日以閏月定四時成歲允釐

百工庶績咸熙

孳尾者孔氏謂乳化曰孳交接曰尾希革謂鳥獸毛羽希少改易毛毳謂毛更生整理毳毛謂鳥獸皆生與毳細毛此蓋萬物之微感天地至和之氣而動作應時不期然而然爾故作歷者觀此則候天時之早晚如禮記月令云魚上冰獺祭魚倉庚鳴鴻鴈來之類者是堯典之遺法也至於是則分至定矣分至定則十二月之中氣無不定矣然後閏餘又得而起王肅云斗之所建是為中氣日月所在斗指兩辰之間

無中氣則置為閏蓋閏月之置在無中氣之月中氣未定則閏餘亦未得而定前之所言皆為定中氣而作既定中氣矣故以閏餘繼之夫作歷之法雖始於定中氣本以置閏歷之置閏其事為大故更申言之咨者胡氏所謂訪問於舊此說未然如咨汝羲暨和咨十有二牧皆勅戒之辭安得為訪問於善哉據此咨字只當訓嗟蓋發語之辭與詩所謂嗟嗟臣工同二字蓋通用也昔三百有六旬有六日以閏月定四

時成歲者作歷之法也蓋作歷之法分周天三百六十五度四分度之一月之行也日十三度十九分度之七常以二十九日過半而與日合一歲所餘凡五日九百四十分日之五百九十二日之行也日一度其為十二月以三百六十日是一歲所餘凡五日九百四十分日之二百三十五以五百九十二并二百三十五是一歲日月所餘共十日九百四十分日之八百二十七十九年年十日為百九十日又十九箇

八百二十七為一萬五千七百一十三以日法九百
四十分除之得十六日以并百九十日為二百六日
不盡六百七十三分為日餘令為閏月得七閏每月
二十九日為二百三日又七箇月餘各四百九十九
分合為三千四百九十三以日法九百四十分除之
得三日共為二百六日不盡亦六百七十三是為一
章之數二十七章為一會三會為一統三統為一元
章會統元運於無窮此四時所以定而歲功所以成

也四時定歲功成然後百工可以允釐而庶績可以咸熙也允釐百工孔氏以謂夫允治百官爾雅曰熙興也郭氏注引此庶績咸熙為證則咸熙者衆功皆興也蓋中氣不正則閏餘不正閏餘不正則雖欲釐百工庶績而無所致力今也中氣定則閏餘正閏餘正則百官得其職萬事得其序蓋不期然而然爾當堯之時洪水橫流泛濫於天下為生民之計可謂急矣然堯不先命禹以平水土命稷以播百穀命契

以作司徒而首命羲和定歷象正閏餘者蓋中氣不正則歷象無得而定苟三年而差一月則必以正月為二月每月皆差九年而差三月則將以春為夏十有九年差六月則四時相反如欲百工之允釐庶績之咸熙不可得矣雖有益稷皋陶之功米安所施哉惟天時既定則人功由是而施堯之治無先於此耳邵康節云日月星辰堯則之江河淮海禹平之其意不殊此

帝曰疇咨若時登庸放齊曰胤子朱啓明帝曰吁嚚訟可乎

疇誰也五子之歌曰予將疇依揚子曰疇克爾咨嗟也疇咨嗟誰也若時者孔氏曰誰能咸熙庶績順是事者將登用之而程氏謂堯老廣求聖賢以遜帝位之意故放齊以胤子朱對不與上文相連其說是也而王氏以若時登庸與若子采相對為言謂疇咨若時者咨順天道者也疇咨若子采者順人事也此說

則非若時登庸以謂順天道如臯陶謨曰咸若時罔
命曰若時瘝厥官豈亦咨順天道也哉疇咨若時者
誰能順是登庸之任蓋將授以天下也放齊曰胤子
朱啓明孔氏云胤國子爵唐孔氏遂以胤侯命掌六
師胤之舞衣為證夫虞書上采堯書為舜典張本則
必推本舜之所以得天下於堯使朱果胤國之君則
其事不應載之堯典其大全無所係也史記作嗣子
丹朱其說是也蓋堯將禪位訪於羣臣放齊以常情

揆之父子相傳古今之通義也故以胥子為對正如漢文帝欲舉有德以陪朕之不能有司請曰子啓最長敦厚寬仁請建以為太子正此意也胡氏曰自古以來父子相繼放齊薦子於義為宜若有太子而不繼君位別求外臣以登庸揆之人情豈期至此誠以罷訟遂致旁求此論得之丹朱而謂之胥子朱案漢志堯禪舜使其子朱處於丹淵誤矣胥子朱啓明者放齊以其為人開明敏悟可授以天下也然放齊雖

以丹朱為可用而堯獨知其不可於是疑怪之曰嚚
訟可乎謂朱之為人口不道忠信之言而且好爭訟
不可以當此大器禹曰無若丹朱傲惟慢遊是好傲
虐是作罔晝夜頡頏罔水行舟朋淫于家此又見其
嚚訟矣夫丹朱嚚訟而放齊謂之開明朱博士曰嚚
訟生於開明君子順開明之性以為善可以無嚚訟
小人因開明之性以為不善適所以為嚚訟而已矣
嚚訟可乎下文無所結者蓋將為舜典張本矣

帝曰疇咨若予采驩兜曰都共工方鳩僝功帝曰吁靜言庸違象恭滔天

疇咨若予采謂能順我事也程氏曰此別一時求人
之事也驩兜曰都者堯既求人以順事驩兜將薦共
工故歎美之曰共工方鳩僝功共工者蓋官稱也其
人方為共工故驩兜薦之之辭曰共工方鳩僝功蓋
方鳩僝功共工之職然也既為共工而又薦之者蓋
亮采惠疇百揆之職也驩兜之薦將使堯大用也方

鳩者孔氏云能方方鳩聚見其功據此方字多與湯
湯洪水方割大禹謨臯陶方祗厥叙方施象刑惟明
同皆是方始之方而先儒皆以為四方之方則失之
矣僞功者孔氏云僞見其功唐孔氏云僞然見之狀
僞之訓見無所經見說文云僞見也史記云方聚布
其功布功者是功之可見也僞之訓見意者亦將有
所出驩兜將薦其人方且鳩聚著見其功而帝亦知
斯人不可以若予采故又疑怪之曰靜言庸違象恭

滔天言此人不可當大用也靜謀也言與之謀則能
言試之以事則違戾為不可用如堯謂舜曰詢事考
言乃言底可績此則庸之而不可違也象恭者聲音
笑貌之恭似恭而非恭也滔天者據此文當是時貌
恭而心實滔天而滔天二字說者不同釋文云外貌
恭敬而心中實包藏滔天莫測蘇氏曰滔滅天理曾
氏云誠者天之道也汨沒其胷中之誠故曰滔天審
如是說則與下文浩浩滔天語意斷異夫典之言滔

天一也豈容有異哉史記作似恭漫天孔氏云貌象
恭敬而心傲很若滔天而不可用也則其與下文滔
天為一意然而洪水之為害際天所覆滔滔皆是謂
之滔天可也象恭云滔天其說有理而難通故齊唐
以謂古者竹簡容二十字自象恭至滔天始及一行
故傳者誤書滔天二字然君子於其所不知蓋闕如
也若欲以已意而增損聖人之經此近世學者之大
患不可為也

帝曰咨四岳

四岳孔氏云即上羲和之四子分掌四岳之諸侯故稱焉唐孔氏云平秩四時之人因主四岳之事此說可信據舜典有云歲二月東巡守至於東岳五月南巡守至于南岳八月西巡守至于西岳十有一月朔巡守至于北岳觀四方諸侯而考制度其首協時月正日同律度量衡夫其考制度既以律歷為先則四岳為羲和四子必矣索方岳之人必用羲和之四子

者程氏云古者天職主察天運以正四時遂居其方以主其時之政在堯則四岳於周則六卿之職統天下之治者也後世學其法者不知其道遂以星歷為工伎之事而與政分矣此實至當之論而李校書據春秋外傳謂羲和為司馬氏之先四岳為申呂氏之先遂以四岳為非羲和四子夫自古帝王及列國世系其誑謬錯雜不可考信者蓋多矣如羲和即重黎也而太史公以重黎為楚國之祖則是此數子既為

司馬氏之先又為申呂氏之先又為楚芊氏之先則
後世安所適從哉按左傳昭公二十九年稱少皞氏
有子曰重顓頊氏有子曰黎則重黎二人各出一帝
而羲和亦不得為一族也羲和非以為一族則司馬
氏申呂氏芊氏同出羲和重黎亦或有此理也

湯湯洪水方割蕩蕩懷山襄陵浩浩滔天下民其咨有
能俾乂僉曰於絲哉帝曰吁咈哉方命圯族岳曰异哉
試可乃已帝曰往欽哉九載績用弗成

曾氏曰岷之詩曰淇水湯湯鼓鍾之詩曰淮水湯湯
江漢之詩曰江漢湯湯故傳曰湯湯者水盛貌言其
逆行而沸騰之謂也詩曰蕩蕩上帝又云蕩蕩無綱
紀文章則蕩蕩者言其泛濫然無畛域之謂也孟子
言善養氣塞乎天地之間而謂之浩然之氣則浩浩
然者言其汗漫浩然無涯涘之謂也此論皆是蓋堯
將訪問能治水者則咨四岳言洪水之害曰湯湯洪
水方割蕩蕩懷山襄陵言此大水逆流而沸騰方且

為害謂其泛濫然無有畛域山之高者則懷而包之
陵之卑者則襄而上之汗漫浩然而無有涯涘也浩
浩滔天者言其浸至幾天也洪水為害如此則斯民
之被其害也為甚故下民其咨此咨與民咨胥怨同
孔氏云咨嗟憂愁病水困苦故問四岳有能治此大
水者將使治之故曰有能俾乂於是四岳同辭嗟歎
薦繇也僉曰於繇哉以謂繇能治此洪水之害也夫
謂之僉曰則四岳為四人也春秋外傳云姬姜之胤

出於禹四岳而曰一王四伯謂之四伯則四岳為四人也必矣說者必欲為一人故韋昭曰四岳官名掌四岳之事為諸侯伯故曰四伯此蓋未嘗深考書史所載而曲為之說既曰僉曰又謂之師錫則四岳為四人無可疑者何必曲為之說哉四岳雖同辭薦鯀以為可治水而堯知其不可用故疑怪之曰吁咈哉言其人違戾而不可用也所以違戾不可用者以其方命圯族而已方命者孔氏云鯀性很戾好此方直

之名命而行事輒毀敗善類以方字為一義以命字連圮族之文非語辭也孟子云方命虐民趙氏注云方猶放也謂放棄不用先王之命但為虐民之政其說可通圮族者程氏云毀敗族類傾陷忌刻之人也如左氏傳云不可教訓不知語言告之則頑舍之則嚚即此所謂方命是也傲狠明德以亂天常此所以圮族也岳曰異哉異已也異哉言已矣乎孔子每言未見其人必曰已矣乎如曰已矣乎吾未見好德如

好色者也又曰已矣乎吾未見能見其過而內自訟者也皆歎其未見其人也此岳曰异哉謂其當時之人未有賢於繇者也故曰异哉試可乃已蘇氏曰可以治水則已無求其他蓋四岳之薦繇治水堯知其方命圯族不可用而四岳之心未足以信此故謂其可以治水而已安可以方命圯族而廢之哉四岳既以繇為可用堯勉而從之以順四岳之意而試之也故繼之曰往欽哉蓋順四岳之意而試繇也夫堯之

聰明既知繇為不可用而四岳之請又從之者李顥
曰堯雖獨明於上衆多不達於下故不得不副倒懸
之望以供一切之求耳此論甚當九載績用弗成者
繇以方命圯族之故堯勉順四岳之請試使之治水
然以歲月之久至於三考而終不能成謂之弗成者
非無功也但無所成耳唐孔氏云繇之治水非無小
益衆人見其有益謂繇實能治之日復一日以終乎
三考之無成衆人乃服然後退之故至九年祭法云

鯀障洪水而殛死得禹能終鯀之功然則禹之大功
頗亦因鯀是治水有益但不能成功故誅殛之此論
善矣然未若程氏之說為盡程氏云舜禹未顯當時
之人其才智未有出鯀之右故也四岳舉之雖無成
功見其所治亦非他人之所及惟其功用有序故自
任以強暴很戾圯族愈甚故惡愈顯而功不能成矣
當時大臣舉之天下信之而其才力又有過人者則
堯不得不任之矣使其當時大臣有過鯀者則堯亦

不任矣此說得之矣靜言庸違象恭滔天與夫九載
績用弗成之下文無所總者為舜典誅四凶張本也
帝曰咨四岳朕在位七十載汝能庸命翼朕位岳曰否
德忝帝位曰明明揚側陋師錫帝曰有鰥在下曰虞舜
帝曰兪子聞如何岳曰瞽子父頑母嚚象傲克諧以孝
烝烝又不格姦帝曰我其試哉女于時觀厥刑于二女
釐降二女于媯汭嬪于虞帝曰欽哉

此序堯將禪位於舜所以為舜張本也朕在位七十

載孔氏云堯年十六以唐侯升為天子在位七十年則時年八十六老將求代此論堯之年數不知出於何書然而在漢之時去古未遠帝王遺書猶有存者孔氏必有所據而云朕在位七十載而年八十六則老期倦于勤矣將使四岳代已攝行天子之事故曰汝能庸命巽朕位猶言陟帝位也王荊公曰自下升則曰陟自外入則曰巽汝能庸命巽朕位謂汝能庸我之命居帝之位攝行天子之事也岳曰否德忝帝

位堯雖使四岳庸命巽朕位而四岳辭讓不敢當則
曰否德言已之不德適所以辱帝位也說者謂堯欲
禪位於四岳而四岳曰否德忝帝位則謂四岳只是
一人以堯之禪位不應讓於四人也夫既以丹朱嚚
訟為不可以受天下蓋欲使四岳自相推舉一人以
授帝位也如漢文帝時有司請建太子帝曰楚王季
父也吳王於朕兄也淮南王弟也皆秉德以陪朕諸侯
王昆弟有功賢臣及有德義者若舉有德謂楚王吳

王淮南王皆秉德以陪朕正如堯之欲禪位於四岳也謂諸侯王宗室昆弟有功賢臣及有德義者皆舉有德正如堯之使四岳明明揚側陋也又何害於四岳之為四人哉曰明明揚側陋者蓋四岳既辭不敢當帝位堯於是使之舉其所知貴而羣臣賤而庶民苟可以當此位者則將受之也史記曰悉舉賢臣及踈遠隱匿者蘇氏曰明其高明揚其側陋言不擇貴賤也其說皆是堯既使四岳明明揚側陋於是四岳

同辭而稱薦不言僉曰而言師錫帝曰者重其事也
鰥者無妻之稱舜年三十尚未娶故曰有鰥在下薛
氏曰舉舜而言其鰥者欲帝妻之也此說雖可喜然
據下文女于時觀厥刑于二女即是妻舜之事出於
堯之意將試舜以所甚難者若以有鰥在下為信則
是以女妻舜者出於四岳之請非堯意也夫岳舉舜
於側微之中未知堯之用否而先請以女妻之非人
情也竊謂此史臣增加潤色之辭因堯以女妻舜遂

加有鰥在下於上以見其未娶爾正如湯誓泰誓稱
予一人當桀紂在上湯武濟否時未可知豈宜遽稱
予一人也哉竊謂皆是史官增加潤色之辭學者以
意逆志可也虞氏也舜名也而或者乃以堯舜為謚
故謚法曰翼善傳聖曰堯仁義盛明曰舜淵泉流通
曰禹幼名冠字五十以伯仲死謚周道也自周以前
蓋未有謚以堯舜為謚者皆是附會之說也四岳既
舉舜以授帝位故帝曰俞然其舉也與曰吁者異矣

予聞如何然我亦聞之其人果如何也司馬文正公
有言曰舜自修於猷畝之中而聞於堯此舜之所難
也舜在猷畝之中而堯聞之此堯之所難也或者以
堯有予聞之言意欲禪舜故以禮讓四岳四岳不受
而乃授於舜此乃史官潤色之辭也因堯以女妻舜
遂加有鰥在下故孔氏於明明揚側陋注云明舉明
人在側陋者信斯言也則是堯之意欲其舉舜也於
有鰥在下注云舜在下民之中衆臣知舜聖賢恥已

不若乃不得已而舉之信斯言也則四岳固不利於堯之禪舜也夫古之聖人作事直已而行無事曲折使其果欲禪舜則直禪舜矣又何必以禮讓四岳而為此不情之事乎蓋堯聞舜之玄德而未知其詳故因四岳之薦而審其如何四岳聞舜之賢方欲薦之適值堯之問而遂舉之矣故程氏云四岳堯之輔臣固賢者也堯將禪位固宜先四岳四岳不可當乃使明揚其可當者而或者多疑以為四岳可受則合授

之不可授則何命之夫堯以天下之公器授人豈宜獨為之哉故必先命大臣百官以及天下有能過已者必見舉矣更相推舉卒將得最賢者然後授以天下曾氏曰唐虞建官內有百揆四岳堯得舜而納于百揆則前此百揆之官未備也建官惟賢時無百揆則官無隆於四岳四岳之賢於羣臣可知矣想其德未足以宅百揆故但為四岳而已則於庸命有所不能亦可知矣古之人自知甚明其所不當受者雖與

之天下不受也此二說者足以補先儒之失堯既審
問四岳舜為人果如何故四岳曰瞽子父頑母嚚象
傲克諧以孝烝烝乂不格姦言舜所以可授天下者
此也瞽者無目稱也蓋舜父名曰瞽瞍詩曰矇矇奏
公則瞍亦無目稱也以其無目故名曰瞽瞍猶云黑
臀黑肩之類史記云盲者之子父頑母嚚象傲則舜
父之無目也審矣而孔氏謂舜父亦有目以其不能
分別善惡故詩人謂之瞽唐孔氏曰孔不然者以經

說舜德行美其能養惡人父自名瞽何須言之若實
無目則是身有痼疾非善惡之事輒云盲者之子欲
何所見乎此說非也四岳舉舜於側微之中故將言
其為誰氏之子也若言其惡則下文曰父頑母嚚象
傲已見之矣不應於上獨言不能分別善惡也夫盲
之為痼疾固非善惡之事然有目而頑猶可言也無
目而頑豈不愈難言哉父頑母嚚象傲謂舜之家有
此三惡也其父則心不行德義之經其母則口不道

忠信之言其弟則又傲慢而不友有此三惡而舜則能克諧其弟以孝於父母烝烝乂不格姦此實人情之至難也烝烝者曾氏云烝如烝之浮浮之烝盛德之氣可以上達化而熟之使不自知故曰烝烝乂不格姦謂烝烝於乂而不至於姦惡也據此言烝烝乂不格姦則是舜未登庸之時瞽瞍與弟已能以善自治不至於姦惡矣彼謂父母使舜完廩捐階瞽瞍焚廩使浚井出從而掩之象曰謨蓋都君咸我績牛羊

父母倉廩父母干戈朕琴朕弼朕二嫂使治朕棲者
此蓋萬章傳聞之誤也四岳既言舜能克諧三惡烝
烝人不格姦以此為可授以天下而堯猶以為未也
且曰我其試哉將欲試舜以考其行迹也其所以試
之者以女而妻之也女于時則孟子所謂二女女焉
者是也曾氏云以女歸人謂之女春秋傳曰宋雍氏
女于鄭莊公又曰晉伐驪戎驪戎男女以驪姬皆非
為之妻也故稱焉蓋古者士庶人一妻一妾舜以堯

歸之二女其一以為媵非皆為之妻劉氏列女傳云
舜身為天子娥皇為后女英為妃以是知二女一為
嫡一為妃非皆為之妻是以謂之女而不謂之妻觀
厥刑于二女刑法也與刑于寡妻之刑同唐孔氏曰
舜家有三惡身為匹夫忽納帝女難以和協觀其施
法度於二女薛氏曰舜之所謂諸難者無難於此釐
降二女于媵汭者王氏以釐降為下嫁此說亦可通
然而以釐降為下嫁則是此一篇所載惟及乎堯之

妻舜而不及乎舜也刑于二女而便與舜典慎徽五
典之文相接甚為不備故不若從孔氏之說云舜能
以義理下帝女之心而不若曾氏之說為尤善曾氏
曰釐理也降下也二女之偶理之使有別故曰釐帝
女之貴下之使不驕故曰降媯水名也汭水之北也
舜之所居在是也時舜未登庸也雖帝女之貴必使
之從夫而居孟子所謂使二女事舜於畎畝之中者
是也嬪於虞者如大明詩云摯仲氏任自彼殷商來

嫁于周曰嬪于京蓋行婦道於虞氏也以其地名而
言之則曰媯汭以其氏族而言之則曰虞舜其實一
也舜既能釐降二女于媯汭堯曰欽哉美舜之辭也
曾氏曰動容周旋中禮者聖人之欽也若有人則作
無人則輟者此其為欽但可以掩塗人之耳目若在
其室而與之居者則不可欺也故能釐降帝女而使
之嬪于虞非能動容周旋中禮以刑之則不能與於
此夫四岳之薦舜將使堯授以天下而其薦之者不

言其他而惟曰父頑母嚚象傲克諧以孝烝烝乂不
格姦堯之試舜將授以天下而其所以觀之者不觀
其他而唯曰女于時觀厥刑于二女者蓋夫夫婦婦
而家道正家道正而天下定矣

尚書全解卷一